

聖門十六子書

先賢卜子傳

先賢卜子名商字子夏衛人少孔子四十四歲篤信夫子以文學著名家負衣若懸鶉或曰子何不仕曰諸侯之驕我者吾不爲臣大夫之驕我者吾不復見柳下惠與後門者同衣而不見疑非一日之間也及見曾子曾子曰何肥也子夏曰吾入見先王之義則榮之出見富貴又榮之兩者未知勝負故癯今先王之義勝故肥是以志之難也夫子讀易至于損益喟然而嘆子夏避席問曰夫子何嘆焉

孔子曰夫自損者必有益之自益者必有決之吾是以嘆也子夏曰然則學者不可以益乎子曰非道益之謂也道彌益而身彌損夫學者損其自多以虛受人故能成其滿博也天道成而必變凡持滿而能久者未嘗有也故曰自賢者天下之善言不得聞于耳矣子夏曰商請志之而終身奉行焉孔子沒教授于西河西河之民疑以爲孔子魏文侯師之文侯以此名聞諸侯子貢曰送迎必敬上交下接若截焉是卜商之行也子夏習于詩能通其義相傳今

毛詩叙子夏之遺說也或曰子夏受易春秋于孔子公羊
高穀梁赤皆從之學春秋者也又傳禮著在禮志墓在曹
州西三十里卜垆都唐貞觀二年從祀元宗時封魏侯宋
封河東公進封魏公明嘉靖九年改稱先賢卜子

闕里誌

詩動天地起予者商溫柔立教文學升堂雅頌得所治亂
攸彰慶成加贈其道彌芳

宋趙安仁贊

通志氏族略卜氏周禮卜人氏也魯有卜楚邱晉有卜
偃楚有卜徒父皆以卜命之其後遂以爲氏如孔子弟

子卜商之徒是也

容齋續筆曰按史記所書子夏少孔子四十四歲孔子卒時子夏年二十八矣是時周敬王四十一年後一年元王立歷貞定王考王至威烈王二十三年魏始爲侯去孔子卒時七十五年文侯爲大夫二十二年而爲侯又六年而卒姑以始侯之歲計之則子夏已百三歲矣方爲諸侯師豈其然乎

史記考證

卜子書

崇川馮雲鵷校刊

上篇

卜商衛人字子夏少孔子四十四歲習於詩能誦其義以文學著名爲人性不宏好論精微時人無以尚之嘗返衛見讀史志者云晉師伐秦三豕度河子夏曰非也曰亥耳讀史志者問諸晉史果曰巳亥於是衛以子夏爲聖孔子卒後教於西河之上魏文侯師之而諮國政焉

子夏問於孔子曰商聞易之生人及萬物鳥獸昆蟲各有

音耦氣分不同而凡人莫知其情唯達德者能原其本焉
天一地二人三三如九九九八十一一主日日數十故人
十月而生八九七十二耦以從音音主辰辰爲月月主馬
故馬十二月而生七九六十三三主斗斗主狗故狗三月
而生六九五十四四主時時主豕故豕四月而生五九四
十五五爲音音主猿故猿五月而生四九三十六六爲律
律主鹿故鹿六月而生三九二十七七主星星主虎故虎
七月而生二九一十八八主風風爲蟲故蟲八月而化其

餘各從其類矣鳥魚生陰而屬於陽故皆卵生魚遊於水
鳥遊於雲故立冬則燕雀入海化爲蛤蠶食而不飲蟬飲
而不食蜉蝣不飲不食萬物之所以不同介鱗夏食而冬
蟄齧吞者八竅而卵生齧齧者九竅而胎生四足者無羽
翼戴角者無上齒無角無前齒者膏無角無後齒者脂盡
生者類父夜生者似母是以至陰主牝至陽主牡敢問其
然乎孔子曰然吾昔聞老聃亦如汝之言子夏曰商聞山
書曰地東西爲緯南北爲經山爲積德川爲積刑高者爲

生下者爲死邱陵爲牡谿谷爲牝蟀蛤龜珠與日月而盛
虛是故堅土之人剛弱土之人柔墟土之人大沙土之人
細息土之人美坳土之人醜食水者善遊而耐寒食土者
無心而不息食木者多力而不治食草者善走而思食桑
者有緒而蛾食肉者勇毅而悍食氣者神明而壽食穀者
智慧而巧不食者不死而神故曰羽蟲三百有六十而鳳
爲之長毛蟲三百有六十而麟爲之長甲蟲三百有六十
而龜爲之長鱗蟲三百有六十而龍爲之長倮蟲三百有

六十而人爲之長此乾《》之美也殊形異類之數王者動必以道動靜必以道靜必順理以奉天地之性而不害其所主謂之仁聖焉子夏言終而出子貢進曰商之論也何如孔子曰汝謂何也對曰微則微矣然則非治世之待也孔子曰然各其所能

孔子曰吾死之後則商也曰益賜也曰損曾子曰何謂也子曰商也好與賢已者處賜也說不若已者處不知其子視其父不知其人視其友不知其君視其所使不知其地

視其草木故曰與善人居如入芝蘭之室久而不聞其香
卽與之化矣與不善人居如入鮑魚之肆久而不聞其臭
亦與之化矣丹之所藏者赤漆之所藏者黑是以君子必
慎其所處者焉

子貢對衛將軍文子曰送迎必敬上交下接若截焉是上
商之行也孔子說之以詩曰式夷式已無小人殆若商也
其可謂不險矣

孔子將行雨而無蓋門人曰商也有之孔子曰商之爲人

也甚慙於財吾聞與人交推其長者違其短者故能久也
以上四條見家語

孔子曰商汝知君之爲君子夏曰魚失水則死水失魚
猶爲水也孔子曰商知之矣

子夏曰君子漸於饑寒而志不避鎬於五兵而辭不攝臨
大事不忘昔席之言

以上二條見尸子

子夏曰日習則學不忘自勉則身不墮亟聞天下之大言
則志益廣

中論

卜子書

崇川馮雲鵷校刊

中篇

孔子讀易至於損益則喟然而歎子夏避席而問曰夫子何爲歎孔子曰夫自損者益自益者缺吾是以歎也子夏曰然則學者不可以益乎孔子曰否天之道成者未嘗得久也夫學者以虛受之故曰得苟不知持滿則天下之善言不得入其耳矣昔堯履天子之位猶允恭以持之虛靜以待下故百載以逾盛迄今而益章昆吾自臧而滿意窮

高而不衰故當時而虧敗迄今而逾惡是非損益之徵與
吾故曰謙也者致恭以存其位者也夫豐明而動故能大
苟大則虧矣吾戒之故曰天下之善言不得入其耳矣日
中則昃月盈則食天地盈虛與時消息是以聖人不敢當
盛升輿而遇三人則下二人則軾調其盈虛故能長久也

子夏曰善請終身誦之

說苑

子夏問書大義子曰吾於帝典見堯舜之聖焉於大禹臯
陶謨益稷見禹稷臯陶之忠勤功勳焉於洛誥見周公之

德焉故帝典可以觀美大禹謨禹貢可以觀事皐陶謨益
稷可以觀政洪範可以觀度泰誓可以觀義五誥可以觀
仁甫刑可以觀誠通斯七者則書之大義舉矣

子夏讀書既畢而見於夫子夫子謂曰子何爲於書子夏
對曰書之論事也昭昭然若日月之代明離離然若星辰
之錯行上有堯舜之道下有三王之義凡商之所受書於
夫子者志之於心弗敢忘雖退而窮居河濟之間深山之
中作壞室編蓬戶常於此彈琴以歌先王之道則可以發

憤慷慨忘己貧賤故有人亦樂之無人亦樂之上見堯舜之德下見三王之義忽不知憂患與死也夫子愀然變容曰嘻子殆可與言書矣雖然其亦表之而已未覩其裏也夫闕其門而不入其室惡覩其宗廟之與百官之美乎

上二條見孔叢子

子夏讀詩已畢夫子問曰爾亦可言於詩矣子夏對曰詩之於事也昭昭乎若日月之光明燎燎乎如星辰之錯行上有堯舜之道下有三王之義弟子不敢忘雖居蓬戶之

中彈琴以詠先王之風有人亦樂之無人亦樂之亦可發
憤忘食矣詩曰衡門之下可以棲遲泌之洋洋可以療饑
夫子造然變容曰嘻吾子始可以言詩已矣然子以見其
表未見其裏顏淵曰其表已見其裏又何有哉孔子曰闕
其門不入其中安知其奧藏之所在乎然藏又非難也吾
嘗悉心盡志已入其中前有高岸後有深谷泠泠然如此
既立而已矣不能見其裏蓋謂精微者也

子夏問曰關雎何以爲國風始也孔子曰關雎至矣乎夫

關雎之人仰則天俯則地幽幽冥冥德之所藏紛紛沸沸
道之所行雖神龍化斐斐文章大哉關雎之道也萬物之
所繫羣生之所懸命也河洛出書圖麟鳳翔乎郊不由關
雎之至則關雎之事將奚由至矣哉夫六經之策皆歸論
汲汲蓋取之乎關雎關雎之事大矣哉馮馮翊翊自東自
西自南自北無思不服子其勉強之思服之天地之間生
民之屬王道之原不外此矣子夏喟然歎曰大哉關雎乃
天地之基也詩曰鐘鼓樂之

子夏問詩學一以知二孔子曰起予者商也始可與言詩
已矣孔子賢乎英傑而聖德備弟子被光景而德彰以上
三條見韓詩外傳

子夏曰春秋之記臣弑君子弑父者以十數矣皆非一日
之積也有漸而至矣凡姦者行久而成積積成而力多力
多而能殺故明主蚤絕之今田常之爲亂有漸見矣而君
不誅晏子不使其君禁侵陵之臣而使其主行惠故簡公
受其禍故子夏曰善持勢者蚤絕姦之萌

子夏見曾子曾子曰何肥也對曰戰勝故肥也曾子曰何謂也子夏曰吾入見先王之義則榮之出見富貴之樂又榮之兩者戰於胷中未知勝負故臞今先王之義勝故肥是以志之難也不在勝人在自勝也故曰自勝之謂強

以上二條見韓非子

子夏貧衣若縣鶉人曰子何不仕曰諸侯之驕我者吾不爲臣大夫之驕我者吾不復見柳下惠與後門者同衣而不見疑非一日之聞也爭利如蚤甲而喪其掌

荀子

魯哀公問子夏曰必學而後可以安國保民乎子夏曰不
學而能安國保民者未嘗聞也哀公曰然則五帝有師乎
子夏曰有臣聞黃帝學乎大真顓頊學乎綠圖帝學學乎
赤松子堯學乎尹壽舜學乎務成跗禹學乎西王國湯學
乎威子伯文王學乎鉸時子斯武王學乎郭叔周公學乎
太公孔子學乎老聃此十一聖人未遺此師則功業不著
乎天下名號不傳乎千世詩曰不愆不忘率由舊章此之
謂也夫不學不明古道而能安國家者未之有也

新序

子夏問孔子曰顏淵之爲人奚若子曰回之仁賢於吾也
曰子貢之爲人奚若子曰賜之辯賢於吾也曰子路之爲
人奚若子曰由之勇賢於吾也曰子張之爲人奚若子曰
師之莊賢於吾也子夏避席而問曰然則四子者何爲事
夫子曰居吾語汝夫回能仁而不能反賜能辯而不能訥
由能勇而不能怯師能莊而不能同兼四子之有以易吾
吾弗許也此其所以事吾而不貳也

列子

孔子謂子夏曰禮以修外樂以制內吾已矣夫

孔子謂子夏曰羣鶴至非中國之禽也

以上二條見禮稽

命徵

楚人獻黿於鄭靈公公子家見公子宋之食指動謂公子家曰我如是必嘗異味及食大夫黿名公子宋而不與公子宋怒染指於鼎嘗之而出公怒欲殺之公子宋與公子家謀先遂殺靈公子夏曰春秋者記君不君臣不臣父不父子不子者也此非一日之事也有漸以至焉

說苑

子夏之晉過衛有讀史記者曰晉師三豕涉河子夏曰非

也是己亥也夫己與三相近豕與亥相似至於晉而問之則曰晉師己亥涉河也辭多類非而是多類是而非是非之經不可不分此聖人之所慎也然則何以慎緣物之情及人之情以爲所聞則得之矣

孟嘗君問於白圭曰魏文侯名過桓公而功不及五伯何也白圭對曰文侯師子夏友田子方敬段干木此名之所以過桓公也卜相曰成與璜孰可此功之所以不及五伯也相也者百官之長也擇者欲其博也今擇而不去二人

與用其警亦遠矣且師友也者公可也感愛也者私安也
以私勝公衰國之政也然而名號顯榮者三士羽翼之也
孔子學於老聃孟蘇夔靖叔無爵位以顯人無賞祿以利
人從屬彌衆弟子彌豐充滿天下王公大人從而顯之有
愛子弟者隨而學焉無時乏絕子夏子貢曾子學於孔子
田子方學於子貢段干木學於子夏吳起學於曾子後學
顯榮於天下者衆矣不可勝數皆所染者得當也 以上三

條見呂氏春秋

有鳥九尾孔子與子夏見之人以問孔子曰鷦也子夏曰
何以知之孔子曰河上之歌云鷦兮鷦兮逆毛衰兮一身
九尾長兮

衝波傳

卜子書

崇川馮雲鶴核刊

下篇

子夏問於孔子曰記云周公相成王教之以世子之禮有諸孔子曰昔者成王嗣立幼未能莅阼周公攝政而治抗世子之法於伯禽欲王之知父子君臣之道所以善成王也夫知爲人子者然後可以爲人父知爲人臣者然後可以爲人君知事人者然後可以使人是故抗世子之法於伯禽使成王知父子君臣長幼之義焉凡君之於世子親

則父也尊則君也有父之親有君之尊然後兼天下而有之不可不慎也行一物而三善皆得唯世子齒於學之謂也世子齒於學則國人觀之曰此將君我而與我齒讓何也曰有父在則禮然而衆知父子之道矣其二曰此將君我而與我齒讓何也曰有君在則禮然而衆知君臣之義也其三曰此將君我而與我齒讓何也曰長長也則禮然而衆知長幼之節矣故父在斯爲子君在斯爲臣居子與臣之位所以尊君而親親也在學學之爲父子焉

學之爲君臣焉學之爲長幼焉父子君臣長幼之逆得而
後國治語曰樂正司業父師司成一有元良萬國以貞世
子之謂也聞之曰爲人臣者殺其身而有益於君則爲之
況于其身以善其君乎周公優爲也

孔子食於季氏食祭主人不辭不食亦不飲而殮子夏問
曰禮乎孔子曰非禮也從主人也吾食於少施氏而飽少
施氏食我以禮吾食祭作而辭曰疏食不足祭也吾殮作
而辭曰疏食不敢以傷吾子之性主人不以禮客不敢盡

禮主人盡禮則客不敢不盡禮也

子夏問於孔子曰居父母之仇如之何孔子曰寢苦枕干不仕弗與共天下也過於朝市不返兵而鬪曰請問居昆弟之仇如之何孔子曰仕弗與同國銜君命而使雖遇之不鬪曰請問從父昆弟之仇如之何曰不爲魁主人能報之則執兵而陪其後

子夏問三年之喪既卒哭金革之事無避禮與初有司爲之乎孔子曰夏后氏之喪三年既殯而致事殷人既葬而

致事周人既卒哭而致事記曰君子不奪人之親亦不可奪親也子夏曰金革之事無避非與孔子曰吾聞諸老聃曰魯公伯禽有爲爲之也今以三年之喪從利者吾弗知也

子夏問於孔子曰居君之母與妻之喪如之何孔子曰居處言語飲食衽爾於喪所則稱其服而已敢問伯母之喪如之何孔子曰伯母叔母疏衰期而踊不絕地姑姊妹之大功踊絕於地若知此若由文矣哉

子夏問於孔子曰凡喪小功已上虞祔練祥之祭皆沐浴於三年之喪子則盡其情矣孔子曰豈徒祭而已哉三年之喪身有瘍則浴首有創則沐病則飲酒食肉毀瘠而病君子不爲也毀瘠而死者君子謂之不孝則祭之沐浴爲齊潔也非爲飾也

子夏問於孔子曰客至無所舍而夫子曰生於我乎館客死無所殯夫子曰於我乎殯敢問禮與仁者之心與孔子曰吾聞諸老聃曰館人使若有之惡有有之而不得殯乎

夫仁者制禮者也故禮者不可不省也禮不同不異不豐不殺稱其義以爲之宜故曰我戰則尅祭則受福蓋得其道矣

子夏問曰官於大夫既升於公而反爲之服禮與孔子曰管仲遇盜取二人焉上之爲公臣曰所與游辟也可人也公許管仲卒桓公使爲之服官於大夫者爲之服自管仲始也有君命焉

以上八條見家語

季康子問於公父文伯之母曰主亦有以語肥也對曰吾

能老而已何以語子康子曰雖然肥願有聞於主對曰吾聞之先姑曰君子能勞後世有繼子夏聞之曰善哉商聞之曰古之嫁者不及舅姑謂之不幸夫婦學於舅姑者也

魯語

衛靈公晝寢而起志氣益衰使人馳召勇士公孫悛道遭行人卜商卜商曰何驅之疾也對曰公晝寢而起使我召勇士公孫悛子夏曰微悛而勇若悛者可乎御者曰可子夏曰載我而反至君曰使子召勇士何爲召儒使者曰行

人曰微情而勇若情者可乎臣曰可卽載與來君口諾延
先生上趨召公孫愔至入門杖劍疾呼曰商下我存若頭
子夏顧咄之曰咄內劍吾將與若言勇於是君令內劍而
上子夏曰來吾嘗與子從君而西見趙簡子簡子披髮杖
矛而見我君我從十三行之後趨而進曰諸侯相見不宜
不朝服不朝服行人卜商將以頸血濺君之服矣使反朝
服而見吾君子邪我邪愔曰子也子夏曰子之勇不若我
一矣又與子從君而東至阿遭齊君重鞞而坐吾君單鞞

而坐我從十三行之後趨而進曰禮諸侯相見不宜相臨以庶掄其一鞞而去之者子邪我邪愔曰子也子夏曰子之勇不若我二矣又與子從君於囿中於是兩寇肩逐我君拔矛下格而還子邪我邪愔曰子也子夏曰子之勇不若我三矣所貴爲士者上攝萬乘下不敢敖乎匹夫外立節矜而敵不侵擾內禁殘害而君不危殆是士之所長君子之所致貴也若夫以長掩短以衆暴寡凌轢無罪之民而成威於閭巷之間者是士之甚毒而君子之所致惡也

衆之所誅鋤也詩曰人而無儀不死何爲夫何以論勇於人主之前哉於是靈公避席拱手曰寡人雖無敏請從先生之勇詩曰不侮矜寡不畏強禦卜先生也

韓詩外傳

趙襄子率徒十萬狩於中山藉芳燔林扇赫百里有人從石壁中出隨煙上下若無所之經涉者襄子以爲物徐察之乃人也問其奚道而處石奚道而入火其人曰奚物爲火其人若不知也魏文侯問之問於子夏曰彼何人哉子夏曰以商所聞於夫子和者同於物物無得而傷閱者遊

金石之間及蹈於水火皆可也文侯曰吾子奚不爲之子
夏曰剗心知智商未能也雖試語之而卽暇矣文侯曰夫
子奚不爲之子夏曰夫子能而不爲文侯不悅

博物志

子夏握正是謂受相

論語摘輔象

子夏六十四人共撰孔子微言

論語識

孔子曰春秋屬商孝經屬參

孝經說

孔子作春秋一萬八千字九月而書成以授游夏之徒游
夏之徒不能改一字

春秋說

昔孔子受端門之命制春秋之義使子夏等十四人求周史記得百二十國寶書九月經立感精符考異郵說題辭
具有其文

閔因叙

子夏問夫子作春秋不以初哉首基爲始何

元命包

衛子夏言有國家者不可不學春秋不學春秋則無以見
前後旁側之危則不知國之大柄君之重任也故或脅窮
失國揜殺於位一朝至爾苟能述春秋之法致行其道豈
徒除禍哉乃堯舜之德也故世子曰功及子孫光輝百世

聖王之德莫美於恕故予先言春秋詳已而畧人因其國而容天下

春秋繫露

麟者太平之符得麟之後天下血書魯端門曰趨作法孔聖沒周姬亡彗東出秦政起胡破術書記散孔不絕子夏明日往視之血書飛爲赤鳥化爲白書署曰演孔圖中有作圖制法之狀

何休注

孔子在位聽訟文辭有可與人共者弗獨有也至於爲春秋筆則筆削則削子夏之徒不能贊一辭

史記

荀子正其衣冠齊其顏色嗛然而終日不言是子夏氏
之賤儒也

毛氏聖門釋非錄漢王充云子夏失明虛妄之言卽宋
王伯厚明方正學蓋亦有辨其未確者

卜子書

崇川馮雲鵷校刊

祠墓古蹟

先賢卜子子夏墓在荷澤縣西三十里名卜垆村

莒國卽今莒州境古莒子國詳圻封春秋時莒有二一爲齊東境之莒邑春秋昭公三年齊侯田于莒是也一爲魯之莒父邑春秋定公十四年城莒父及霄又子夏爲莒父宰是也惟此爲古莒國之莒一云卽魯之莒父邑今州治西南有子夏祠

賢賢堂在莒州城內子夏祠東

先賢卜子祠在曹州府城北十里墓前祀卜子商

以上四

條見山東通志

子夏書院在莒州南一百三十里書院村有古寺相傳爲

卜子夏書院有祠堂舊基有曬書臺

莒州志

西河在安陽縣境內卜子夏田子方段干木所遊地以魏

趙多儒在齊魯鄒之西故呼爲西河非龍門西河也

河南

通志

先賢卜子衛人今河南懷慶府溫縣是也生於周敬王十三年從孔子學於洙泗孔子卒設教西河之上魏文侯師事之卒葬曹州城北十里有先賢墓生二子長芹早喪無嗣哭之失明以次子判爲宗子

卜子宗譜

卜子書

崇川馮雲鵷校刊

宗子世表

二代判字子決博學不仕受詩於先賢能得其傳生子

哲

三代哲生二子能智能明

四代能智生子丕

五代丕生子晃

六代晃生二子式法

卜子書

卷五

七代式字子怡初拜漢中郎賜爵左庶長旋拜齊王太傅轉爲相元鼎中代石慶爲御史大夫以直言放歸田里將遊於齊道卒於鉅鉅人思慕同助其塋子孫因家焉名其地曰卜怡塢有墓碑生二子彪彪

八代彪字伯雲爲河內太守有政績生三子可大可大可立

九代可久生二子思孝思忠

十代思孝生二子安維國中

十一代安維字匡公從龔勝學以王莽篡漢不仕生二子世隆世祿

十二代世隆字子盛爲大中大夫生二子忠剛

十三代忠生子階

十四代階字象升爲東平王蒼郎中合時明帝遣使入西域求佛教作崇正論以寓意生二子守約守正

十五代守約字學會從鄭均學以廉潔稱於鄉生二子

契錫

十六代契生三子咸良康

十七代咸字先恒爲太尉李固掾生二子興邦安邦

十八代興邦字大業舉孝廉以宦官用事黨錮善類隱

於縣之金山生二子仁旃

十九代仁字善長有智勇從李將軍典爲校尉生二子

良弼良玉

二十代良弼生二子修已修德

二十一代修已字敬直爲晉瑯琊王從事生子紹

二十二代紹字述之避明帝諱改名闡衣生二子殷貴
二十三代殷生子暨

二十四代暨弱冠早逝生子文蔚

二十五代文蔚生二子叔卿叔封

二十六代叔卿生二子世祚祿

二十七代世祚生二子玘玘

二十八代玘生子之才

二十九代之才字... 州司戶參軍生子大中

三十代大中生二子秉義秉彛

三十一代秉義字崇正官建州太守生二子長言善言

三十二代長言生子繼

三十三代繼字承先博學力行兼精詩賦學者稱爲靜軒先生生二子光廷光贊

三十四代光廷生子鯨

三十五代鯨字潛齋著有樂善集生子記

三十六代記生子章

三十七代章生子洪諫

三十八代洪諫生三子合演合嚴合威

三十九代合演字人龍官中憲大夫因唐末世亂致仕
生子紹光

四十代紹光生子在

四十一代在生三子師孟師顏師尹

四十二代師孟生三子中統中繼中緒

四十三代中統生子大通

四十四代大通生三子并吉允吉安吉

四十五代并吉字元善爲單州司判生子重立

四十六代重立生二子時宥時寬

四十七代時宥生子士英

四十八代士英生二子都枚

四十九代都無子以胞姪述承嗣

五十代述生二子則聖則孔

五十一代則聖字希之時河決滄沒廬舍人民死者無

筭則聖家以大木爲筏獲免人以爲不絕先賢之祀
云生子問疑

五十二代問疑生子易

五十三代易生二子先覺先知

五十四代先覺字天民增廣生員生子克明

五十五代克明生子瑞

五十六代瑞生子崇高

五十七代崇高恩例壽官生子溥

五十八代溥生二子文士文進

五十九代文士生二子斐盛

六十代斐生子加民

六十一代加民崇禎八年山東提學准給衣頂主奉祀

事生子景星

六十二代景星康熙三年入鉅野縣庠生生子年昌

六十三代年昌康熙七年山東提學准給衣頂主奉祀

事至康熙十八年入鉅野縣學庠生生子尊賢

六十四代尊賢康熙五十一年衍聖公准給衣頂主奉
祀事至康熙五十九年巡撫部院李援例具題嗣准
禮部咨開奉

旨授五經博士之職世襲主祀生二子科美

六十五代科乾隆八年衍聖公咨准禮部考授世職主
奉祀事無嗣以胞弟美長子玉柱爲宗子

六十六代玉柱乾隆十七年衍聖公咨准禮部考授世
職主奉祀事生二子國華邦華

六十七代國華乾隆五十三年二月承襲翰林院五經
博士主奉祀事生子心端

六十八代心端自幼失音未襲生子先立

六十九代先立字廣運號德譜嘉慶十七年二月承襲
翰林院五經博士主奉祀事生子昭灼

先賢有子傳

先賢有子名若字子有魯人爲人強識好古道夫子旣沒
曾子曰吾聞之夫子喪欲速貧死欲速朽有子曰是非君
子之言也然則夫子有爲言之也曾子以告子游子游曰
甚哉有子之言似夫子也昔者夫子居于宋見桓司馬爲
石槨三年不成夫子曰若是其靡也死不如速朽之爲愈
也南宮敬叔反必載寶而朝夫子曰若是其賁也喪不如
速貧之爲愈也曾子以告有子有子曰然吾固曰非夫子

之言也他日子夏子張子游以有若似聖人欲以所事夫子者事之強曾子曾子曰不可乃止唐封汴伯宋封平陰侯明嘉靖九年改稱先賢有子

闕里誌

國朝乾隆三年升有子於東哲位十子之次

文獻考

江熙曰爲家者與一家俱足乃可謂足豈可足己而謂之足也夫儉以足用寬以愛民日計之可不足而歲計則有餘十二而行日計可有餘歲計則不足行十二而不足不思損而益是揚湯止沸疾行遁影有子之所以發德音者

也

人稟秀德氣貌或同而子儼然温温其容兩端發問未答
幾鋒以禮節和斯言可宗 宋高宗贊

通志氏族略有氏風俗通有巢氏之後孔子弟子有若
魯人漢有有祿

有子宗譜有氏之先系出自有巢氏歷唐虞夏商不能
紀其傳武王克商後其裔孫有昌爲邾邑宰遂遷於魯
傳至四世有貽娶樊氏生有若於洙泗之陽

謹按闕里誌載素王世紀周敬王十一年壬辰魯定
公元年是年有若生蓋其時孔子在陳年四十三歲
矣家語七十二弟子解以爲少孔子三十六歲則生
於昭公二十六年史記少孔子十三歲正義引家語
云少孔子三十三歲並與世紀不同而有子宗譜云
生於昭公四年爲景王之七年癸亥孔子年十四歲
然則史記所載爲得其實也道光壬辰嘉平月崇川
後學馮雲鷄謹識

有子書

崇川馮雲鵷校刊

年表

周景王七年魯昭公四年癸亥十一月初四日有子生卽
今之九月初四日也

九歲辛未是年父卒母樊氏治喪葬於魯城南沂河之
陽

十二歲甲戌母教之習禮容

十三歲乙亥母教之入小學

十五歲丁丑母爲之求婚於南宮氏

十七歲己卯委質因門人請爲孔子弟子

十九歲辛巳娶南宮氏是年景王崩敬王立

二十二歲甲申是年昭公出奔從孔子適齊

二十三歲乙酉從孔子在齊聞韶

二十四歲丙戌從孔子在齊

二十五歲丁亥從孔子自齊反魯

二十七歲己丑是年子理生

二十九歲辛卯是年昭公薨於乾侯定公立

三十四歲丙申是年孔子初爲中都宰從之

三十六歲戊戌是年孔子爲魯司空從之

三十九歲辛丑母樊氏卒與父合葬鄉人服其盡禮

四十四歲丙午是年定公薨哀公立

五十二歲甲寅吳伐魯舍於庚宗遂次於泗上微虎欲
宵攻王舍私屬徒七百人三踊於幕庭卒三百人有

子與焉

卷一
五十五歲丁巳從孔子刪定六經講習經學

五十八歲庚申是年春西狩獲麟孔子修春秋

六十歲壬戌是年孔子卒有子與諸弟子服心喪葬孔

子於泗上偕諸弟子各記所聞以爲論語家語諸書

六十三歲乙丑是年敬王崩元王立

六十七歲己巳夫人南宮氏卒

六十九歲辛未是年元王崩貞定王立

七十一歲癸酉是年哀公薨悼公立

七十二歲甲戌寢疾於五月初九日卒卽今之三月初
九日悼公親爲弔奠子理治喪與母南宮氏合葬於
魯城南三里許沂河之南

有子書

崇川馮雲鶴校刊

上篇

有若問於孔子曰國君之於同姓如之何孔子曰皆有宗道焉故雖國君之尊猶百世不廢其親所以崇愛也雖於族人之親而不敢戚君所以謙也

家語

有子惡卧而焯掌可謂能自忍矣

荀子

有若問於曾子曰聞喪於夫子乎曰聞之矣喪欲速貧死欲速朽有子曰是非君子之言也曾子曰參也聞諸夫子

也。有子又曰：是非君子之言也。曾子曰：參也與子游聞之。有子曰：然，然則夫子有爲言之也。曾子以斯言告於子游。子游曰：甚哉有子之言似夫子也。昔者夫子居於宋，見桓司馬自爲石椁三年而不成，夫子曰：若是其靡也，死不如速朽之愈也。死之欲速朽，爲桓司馬言之也。南宮敬叔反，必載寶而朝，夫子曰：若是其貨也，喪不如速貧之愈也。喪之欲速貧，爲敬叔言之也。曾子以子游之言告有子，有子曰：然，吾固曰非夫子之言也。曾子曰：子何以知之？有子曰：

夫子制於中都四寸之棺五寸之槨以斯知不欲速朽也
昔者夫子失魯司寇將之荆蓋先之以子夏又申之以冉
有以斯知不欲速貧也

禮弓

宓子賤治單父有若見之曰子何臞也宓子曰君不知賤
不肖使治單父官事急心憂之故臞也有子曰昔者舜鼓
五絃歌南風之詩而天下治今以單父之細也治之而憂
治天下將奈何乎故有術而御之身坐於廟堂之上有處
女子之色無害於治無術而御之身雖瘁臞猶未有益

韓

非子

昔者哀公問於有若曰年饑用不足如之何有若對曰盍
徹乎蓋損上而歸之於下則忤於耳而不合於意遂逆而
不用也此所謂正其行而不苟合於世也有若豈不知阿
哀公之意爲益國之義哉夫君子直道而行知必屈辱而
不避也故行不敢苟合言不爲苟容雖無功於世而名足
稱也雖言不用於國家而舉措之言可法也

新語

附錄

荀子解蔽篇空石之中有人焉其名曰斂其爲人也善
射以好思耳目之欲接則敗其思蚊蚋之聲聞則挫其
精是以闢耳目之欲而遠蚊蚋之聲閑居靜思則通思
仁若是可謂微乎孟子惡敗而出妻可謂能自彊矣有
子惡臥而燂掌可謂能自忍矣未及好思也闢耳目之
欲蚊蚋之聲聞則挫其精可謂危矣未可謂微也夫微
者至人也至人也何彊何忍何危

有子書

崇川馮雲鶴校刊

中篇

有子與子游立見孺子慕者有子謂子游曰予壹不知夫
喪之踊也予欲去之久矣情在於斯其是也夫子游曰禮
有微情者有以故與物者有直情而徑行者戎狄之道也
禮道則不然人喜則斯陶陶斯咏咏斯猶猶斯舞舞斯愠
愠斯戚戚斯歎歎斯辟辟斯踊矣品節斯斯之謂禮人死
斯惡之矣無能也斯倍之矣是故制絞衾設奠娶爲使人

勿惡也始死脯醢之奠將行遣而行之既葬而食之未有見其饗之者也自上世以來未之有舍也爲使人勿倍也故子之所刺於禮者亦非禮之訾也

悼公之母死哀公爲之齊衰有若曰爲妾齊衰禮與公曰吾得已乎哉魯人以妻我

孺子贛之喪哀公欲設撥問於有若有若曰其可也君之三臣猶設之顏柳曰天子龍輅而棹幃諸侯輅而設幃爲榆沈故設撥三臣者廢輅而設撥竊禮之不中者也而君

何學壽

以上三條見檀弓

王伯厚曰或問論語首篇之次章卽述有子之言而有子曾子獨以子稱何也曰程子謂此書成於有子曾子之門人也曰有子謂孔子之沒諸弟子以有子爲似夫子立而師之其後不能對諸子之問乃叱避而退則固常有師之號是以稱子其說非歟曰非也此太史公采雜說之謬宋子京蘓子由辨之矣孟子謂子夏子張子游以有若似聖人欲以所事孔子事之朱子云蓋其言

行氣象有似之者如檀弓所記子游謂有若之言似夫子之類是也豈謂貌之似哉曰有子不列於四科其人品何如曰宰我子貢有若智足以知聖人此孟子之言也蓋在言語之科宰我子貢之流亞也曰有子之言可得聞與曰盡徹之對出類拔萃之語見於論孟而論語首篇所載凡三章曰孝弟曰禮曰信恭尤其精要之言也而論晏子焉知禮則檀弓述之矣荀子云有子惡臥而焯掌可以見其苦學曰朱子謂有子重厚和易其然

與曰吳伐魯微虎欲宵攻王舍有若與焉可謂勇於爲
義矣非但重厚和易而已也曰有子曾子並稱然斯道
之傳唯曾子得之子思孟子之學會子之學也而有子
之學無傳焉何與曰曾子守約而力行有子知之而已
智足以知聖人而未能力行也家語稱其彊識好古道
其視以魯得之者有間矣曰學者學有子可乎曰孝弟
務本此入道之門積德之基學聖人之學莫先焉未能
服行斯言而欲凌高厲空造一貫忠恕之域吾見其自

大而無得也。學曾子者當自有子孝弟之言。始曰檀弓。記有子之言皆可信乎。曰王無咎嘗辨之矣。若語子游欲去喪之踊。孺子斃之喪。哀公欲設撥以問。若若對以爲可。皆非也。唯論語所載爲是。

閻百詩云嘗讀此條因悟有若不可屈兩廡當於廟庭上廣而爲十二。哲德行有三人焉。閔子騫。冉伯牛。仲弓。言語亦三人焉。宰我。子貢。有若。政事亦三人焉。冉有。季路。公西華。文學亦三人焉。子游。子夏。子張。或曰公西華。

政事之才實並由求既聞命矣而子張之列文學也何
居余曰子游子夏子張皆有聖人之一體他日子夏子
張子游以有若似聖人皆孟子言也前以孟子斷升有
若則此以孟子斷屬文學於子張也何疑

有子書

崇川馮雲鶴校刊

下篇

孔子既沒弟子思慕有子狀似孔子弟子相與共立爲師師之如夫子時也他日弟子進問曰昔夫子當行使弟子持兩具已而果兩弟子問曰夫子何以知之夫子曰詩不云乎月離于畢俾滂沱矣昨暮月不宿畢乎他日月宿畢竟不雨商瞿年長無子其母爲取室孔子使之齊瞿母請之孔子曰無憂瞿年四十後當有五丈夫子已而果然敢

問夫子何以知此有若默然無以應弟子起曰有子避之
此非子之座也 史記

有若曰晏子一狐裘三十年遣車一乘及墓而返國君七
个遣車七乘大夫五个遣車五乘晏子焉知禮曾子曰國
無道君子恥盈禮焉國奢則示之以儉國儉則示之以禮
有子蓋旣祥而絲縷組纓

有子之喪悼公弔焉子游擯由左 以上三條見檀弓

有子惡臥自碎其掌 新論

有若似孔子孔子死弟子思慕共坐有若孔子之座弟子知有若非孔子也猶共坐而尊事之雲雨之知使若諸弟子之知雖知土龍非真然猶感動思類而至

論衡

宋洪邁辯曰史記有若傳云孔子沒弟子以若狀似孔子立以爲師他日進問曰昔夫子當行使弟子持雨具已而果雨弟子問何以知之夫子曰詩不云乎月離于畢俾滂沱矣昨暮月不宿畢乎他日月宿畢竟不雨商瞿年長無子孔子曰瞿年四十後當有五文夫子已而

果然敢問何以知此有若無以應弟子起曰有子避之
此非子之座也予謂此兩事殆近于星歷卜祝之學何
足以爲聖人而謂孔子言之乎有若不能知何所加損
而弟子遽以是斥退之乎孟子稱子夏子張子游以有
若似聖人欲以所事孔子事之曾子不可但言江漢秋
陽不可尚而已未嘗深詆也論語記諸善言以有若之
言爲第二章在曾子之前使有避座之事弟子肯如是
哉檀弓載有子問曾子喪欲速貧死欲速朽兩語以爲

非君子之言又以爲夫子有爲言之子游曰甚哉有子之言似夫子也則其爲門弟子所敬久矣太史公之書于是爲失矣且門人所傳者道也豈應以狀貌之似而師之邪世所圖七十二賢畫像其畫有若遂與孔子略等此又可笑也

有子書

崇川馮雲鵠校刊

祠墓古蹟

先賢有子墓在魯城南三里許北枕沂河東臨沂水源頭
西近舞雩臺址其南各二三里餘左有魯諸王墓右爲南
宮埠村宋太宗祥符三年改封平陰侯詔修林墓勅建享
祠三楹墓門一座內列石翁仲石虎石馬石羊墓高一丈
五尺至明季值東山寇亂悉毀於兵火曲阜縣世尹孔貞
叢親爲致祭及崇禎末年復值流寇猖獗誤爲魯諸王墓

掘取金寶等物內遇巨石掩覆開掘未獲而去墓址猶存
有子墓在曲阜城南三里許已成荒塚乾隆五十三年議
築圍牆一道週圍六十六丈中建大門饗堂甬路月臺以
昭尊崇衍聖公捐田九十畝以備祭祀

先賢有子祠故在肥城西北有庄歲久傾圮僅存墓址乾
隆四十八年改建北門大街路東房基一所二畝三分創
修大門垂門並正殿兩廡東爲博士宅肥邑有廢義學曰
三頃有奇給爲世產以奉祀事

有子祠一在魯城東北十里泗河之陽有房里爲有子故居處久廢宋元間遺址猶存一在魯城內古釣臺右側相傳爲有子講學著書處久廢一在平陰縣西北有莊係十四代孫綱創建世祀

以上四條見有子宗譜

有子書

崇川馮雲鶴校刊

宗子世系

二代理克紹前業生子廷鐸

三代廷鐸生子經文

四代經文有孝行生子周木

五代周木生子鵬次鶴

六代鵬生子臨渭次臨濱

七代臨渭修明前業供祀事生子敦次化

八代敦生子禎吉次禎喜禎利

九代禎吉至性孝友鄉黨稱服生子綽

十代綽生子培梅

十一代培梅漢高帝過魯以太牢祀孔子詔先賢子孫
俱入廟觀禮生子雲

十二代雲生子元忠

十三代元忠舉議仕郎生子綱次紀

十四代綱携族徙居平陰縣西北因名有莊生子科

十五代科博通經學教授生徒爲魯從事生子隆

十六代隆生子士標

十七代士標生子繩祖次繩武

十八代繩祖無嗣以繩武子志繩爲嗣

十九代志繩通經學爲蘭台令生子敬

二十代敬生子大成

二十一代大成清操自勵不樂仕進生子獻瑞

二十二代獻瑞生子好讓

二十三代好讓生子珩次璈

二十四代珩生子宏

二十五代宏授毅城尉生子國宗

二十六代國宗生子文新

二十七代文新訂叙譜誌生子思義

二十八代思義生子廣

二十九代廣生子桂芳

三十代桂芳生子澤遠

三十一代澤遠生子淳

三十二代淳生子化龍

三十三代化龍生子恕已

三十四代恕已因避兵荒携同族衆徙居益都生子塾
五載仍回原籍重修譜誌

三十五代塾生子惠

三十六代惠生子泰

三十七代泰生子知章

三十八代知章生子恪次恭

三十九代恪生子連登

四十代連登生子永修

四十一代永修生子望

四十二代望生子丕顯丕承丕緒

四十三代丕顯生子純古

四十四代純古生子道

四十五代道生子敏行次敏學

四十六代敏行生子松

四十七代松生子業

四十八代業生子仁甫

四十九代仁甫生子賢

五十代賢生子善長

五十一代善長因山東寇亂修葺祖祠訂叙譜誌以垂

久遠生子諭

五十二代諭生子玉秀

五十三代玉秀生子克寬

五十四代克寬生子權

五十五代權生子勤功

五十六代勤功生子維世

五十七代維世生子益友

五十八代益友生子光兆

五十九代光兆於明永樂二年蒙巡按各憲訪求先賢

有子後裔准給衣衿承襲奉祀生重修祖祠彙續譜

誌以垂久遠生子覺

六十代覺承襲奉祀生子三仁次三讓

六十一代三仁承襲奉祀生子全

六十二代全承襲奉祀生子興孝

六十三代興孝承襲奉祀生子擇善

六十四代擇善生子天竒次天諳天佑

六十五代天竒生子加召

六十六代加召生子忠名次忠譽

卷之五
六十七代忠名生子志學次志純

六十八代志學於康熙五十八年准充奉祀生子錫侯

次錫祿

六十九代錫侯生子書

七十代書續補宗譜生子克俊次克昌

七十一代克俊生子守業

七十二代守業於乾隆五十三年始奉考准世襲翰林

院五經博士增修譜誌